

FURLAN A SCUELE, LA SIELTE JUSTE

Decidi di aderî al insegnament de lenghe e de culture furlane - sielte che e fâs za passe il 76% des fameis - e je une grande oportunitât pai plui piçui. Une sielte che i gjenitôrs a puedin fâ **fin ai 28 di Zenâr dal 2022** sul sît www.istruzione.it o domandant informazions ae segretarie de scuele. L'insegnament de marilenghe, te scuele de infanzie, te primarie e te secundarie di prin grât, al è di almancul 30 oris ad an, cence gjavâ nuie a chês altris materiis. La metodologjie didatiche e je chê plui efficace e inovative a nivel european: l'Insegnament Integrât di Lenghe e Contignût - CLIL.

Imparâ la lenghe furlane nol puarte dome vantaçs linguisticis e culturâi, ma al jude ancje a imparâ altris materiis, tant che la matematiche. Di fat, daûr di un studi dal Istitût di Svilup e Ricercje par l'Insegnament de matematiche de Universitât di Dortmund, i fruts plurilenghî (che a fevelin par esempi talian e furlan) a àn plui facilitât tal imparâ la aritmetiche. Doprâ plui lenghis in cjase e la sielte di un percors plurilenghâl ancje a scuele, a son dôs oportunitâts une vore impuartantis pes gnovis gjenerazions. I vantaçs a son cetancj. Un frut che al studie il

furlan, par esempi, al impare miôr ancje altris lenghis. Al aumete la capacitât di aprediment e la velocitât di comprension, ma ancje la creativitât, l'adatament e il savê vierzisi a chei altris.

«Chel furlan al è un patrimoni culturâl unic che o vin di preservâ - al à ricuardât Eros Cisilino, president de Agenzie regionâl pe lenghe furlane, ARLeF -. Un dai imprescj plui impuartants par fâlu al è propit l'insegnament de marilenghe ai fruts. A son lôr il nestrî futûr e chel de nestre lenghe. Par chest la scuele, e la formazion in gjenerâl, a son un dai arguments centrâi dal "Plan gjenerâl di politiche linguistiche pe lenghe furlane 2021-2025". Dongje di chest, però - e no fermarai mai di dîlu - e covente la volontât di ognidun di nô, tes nestrîs cjasis, cui nestrîs fîs».

Daûr des peraulis dal president de Agenzie, di fat, une volte cjapade la decision di aderî al insegnament dal furlan a scuele, al è une vore

Al è timp fin ai 28 di Zenâr par aderî al insegnament de marilenghe a scuele. Cun vantaçs no dome linguisticis ma ancje par altris materiis, tant che la matematiche



impuartant sostignî la trasmission de lenghe ancje in famee, cemût che al ven spiegât te vuide "Cressi cun plui lenghis", realizade de

ARLeF pai neogjenitôrs e che si pues discjamâ a gratis sul sît artef.it. Dentrî si cjatin conseis su lis strategiis linguisticis plui justis di doprâ, tant che chê clamade "**une persone-une lenghe**" (cuant che dome un gjenitôr al cognòs il furlan, ogni gjenitôr al fevele cul frut simpri e dome te lenghe che al sa) e chê clamade "**lenghe de famee**" (cuant che ducj i doi gjenitôrs lu cognossin, a fevelin al fi simpri par furlan, doprant il talian dome cuant che al covente).